

**Kanoana**

<i>Te Kamauri</i>	1
<i>Kaongora mai iroumi</i>	2
<i>Taeka n reirei</i>	5
<i>Ana Tangira Te Uea</i>	7
<i>Te Maiu ae tabu</i>	11
<i>Titiraki ma Kaekaia</i>	12

**Te Kamauri**

*"Ti bon riai n  
namakina te  
kamaiuaki ni koaua  
man mamarara, ao ara  
kanganga ma rawawata  
aika a tia n taotaonira  
inanon mangautin ao  
ana tokanikai Iesu iaon  
te mate ....."*

Kiribati Catholic  
Charismatic Renewal  
Service


Ibukin am rongorongo, taiaoaka reitaki ma  
Uriam Timiti, Beneteta Raobati ao Kautoa  
Tonganibela.

Phone: + 679 3385364  
Fax: 555-555-5555  
E-mail: timiti\_u@usp.ac.fj;  
bene\_raobati@yahoo.com.au  
kautoaj3tki@gmail.com

ao ni mwengara ao riki bon inanora n tata-bemanira ba ti aonga ni kakoaua reken te kamaiuaki irouni Natina ae lesu. Ngkai bon Nei Maria ae E ruo rirouna te Atua te Nati nako aonteaba ao boni ngaia naba ae e na buokira ni kawaerakeira nako Karawa nako rarikin Natina.

E tia ana babaire te NSC (ana rabatana ni babaire Charismatic iaon Kiribati) ma Fr Koru are bon ngaia ae tararua te Charismatic iaon Kiribati ba tina manga karaka aron ara waki n nebonebo ma tinara ae Nei Maria. Ngkana ti kaira Nei Maria ba raora n neboa natina ao ena bon raonira naba Tamnein natina ae lesu ngkai E bon tatangira tinana ba raona n taabonako.

Ibukia kaain te Charismatic nte aonnaba, te theme ke te rongorongo ibukin te ririki aio bon "Kakorakorin ao kabutanakoan uran te ai - SPREADING THE FIRE" E kakaongora "Taeka n Reirei" n Emmanuera nte tai aio. Bon ana tataro Emmanuera E na kabaroa iaomi ana karaoiroi te Atua inanon am tai wareware ao mani karekei tibangami aika a tamaraoa ibukin irirakin ao maeuakinan Nanon te Atua n taa nako. Ana kakabai Te Uea iaora ni kabane ma ara utu ntaainako.



Kam na bane ni mauri n ana Tangira te Uea. Ti uaia ni karaba ao n neboa te Uea ibukin teimatoan ana kakawakin nakira ni kabane riki ngkai E a tia ni kateirakea Emmanuera ni manga reita tibangana ae kakawaki ibukira ngaira ara taan wareware aika karineaki, ao ai tarira ma manera inanon ara charismatic iaon Kiribati, Nutiran, Biti ao n tabo nako ake kam mena iai.

Tera tibangara mairoun te Uea inanon tain te Bakate aio, a bia manga kabouaki ma ni kamauaki ara waaki ni kabane, ao ni kaania riki Te Uea inanon maura. Inanon ara borau ae nako ma Te Uea inanon te wiiki ae tabu ao nibongin te karemo ao ti kona ni miakina iai ana kawai ni kamaiu Te Uea nakira ni kabane.

Ti bon riai n namakina te kamaiuaki ni koaua man mamarara, ao ara kanganga ma rawawata aika a tia n taotaonira inanon mangautin ao ana tokanikai lesu iaon te mate.

Inanon Emmanuera aio ao ti teimatoa ni kamoamoana kamaeu ara Uea ae lesu rinanon tinana ae Nei Maria, ngkai ti kakoaua ba bon ti n ana kairiri ao ana buoka Nei Maria ae ti kona iai n riki ba bannan ma katotongan lesu ae Natina. Inanon taian reirei ma karaki ni kamaiu n ana ibuobuoki Nei Maria aika ko kona wareki ao bon te kantanninga ba ngaira ni kabane ti na karekea nnen Nei Maria n ara utu





## Kaongora mai Irouumi

**Kaongora mai St Faustina, Betio Parish  
Nei Taona (Tlibi Rita St Faustina mai Betio) ao Teburoburo Eita**

Aikai rongorongo tabeua man te charismatic i aon Betio Parish e e kinaki naba n ara ae St Faustina. Aika ara rongorongo aika imototo i nanon ratokin te ririki 2015 n ikotaki ma moan te ririki 2016.

Te moan bai bon te karabara ae batu nakoimi tarira ao manera i aon Betio i bukin ami boutoka nakon ami taibora. Ti a reitira riki n te tai aio ni karaba tamara ae te tama Koru ngkai e a tia ni karanganakoa ana tangira Te Uea nakoira ngaira kain Betio rinanon ana kamarurung ao ana kakorakora are e a karoia n te anga reirei, te tutia ni kamarurung ao ai te tutia ni katoki aoraki n taai aika a nako.



N tain te maroro ma Fr Kuro n 9 Ritemba 2015, are e boboto i aon taekan te rita ao te kabaebe i nanon tain te katoki aoraki ao ti kakoaua ba a bane n reke iai tibangara – a reke naba otara ao ai aron ae e a kaukaki riki ara taratara ma ara kantaninga nakon ana kantanninga Te Uea i bukira i nanon ara botaki ni charismatic i aon Betio. E bon reke naba ana tai te tama ni kaekai titiraki ni kan ota ake a tabekaki mairouia kain te botaki.

### Te riita

- E riai te rita ni karaoi raoi tabena ake e a tia n muiokoaki iai n aron teuana kairan te nebonebo ao ni manga muiokoa temanna ae e na onea muina n taai ake e na tabe iai ke e na aki reke iai rokona.
- A riai kain te botaki ke te kurubu n te charismatic ni karinea ana babaire te rita ao ni kaota te boutoka ma te ongotaeka nakoina.

### Kabaean te riaboro

- Ngkana iai am tamnei ae kaoti i nanon tain te katoki aoraki ao ko riai ni kabaea i aon ana kaibangaki lesu i bukina ba tiaki kona ni kina ni koaua raoi ara tamnei are e kaoti e ngae ngkana te tama ke Nei Maria ke lesu.
- Ngkana nanon Te Uea ba e na bae ao e na bon kabaea ngaia are ti bon riai ni kabaebe n taai nako

### Te Tutia n Charismatic iaon Betio

N te moanibong 17/12/15 ao e karoaki te tutia ni charismatic n te kaotitaeka i Temakin n

te aoa 6pm. E kakukurei te tutia ba e a manga karina angira ao ni kakorakoraira i nanon te tai aio ao ni manga kaungai riki nanora nakon tibangara aika kakaokoro.

E karoaki naba te tutia ni charismatic ao imina te katoki aoraki, n 24<sup>th</sup> Tianuare 2016, n te umantabu ae te Kaotitaeka i Temakin ao e onrake te umantabu are e a bon oti naba iai aron kainanoan ana Tangira Te Uea.

N aia rongorongo nake aki reke rinia ma a noria mai tinaniku ao a taku ba e onrake te kaa i rarikin te umantabu, e tira te aomata ao te anene e rebwetaua ai aron tarakin te baka n amarake ae bubura n aron te mare ke te rekenibong. Tarakia aomata ake a ira te botaki arei a rangi ni kukurei ao a batu aomata ake a bon baka nanoia mai tinaniku ni kan iri ma aki kona ba a rimui ba a aki kaman ataia.

### Kawarakin te atimakoro ae Maoton Te Maanga, Abaokoro. Tarawaieta.

Maoton Te Maanga bon te atimakoro teuana irarikin Abaokoro i Tarawaieta. Te aba aio bon aban te Ekaretia ao e tia baireana ba karoaki aona ba te tabo n rereua ke te "Retreat Center" irouwia Katorika iaon Tarawa. E rabaraba naba iai Te NSC, ana rabata n babaire te Charismatic iaon Kiribati ba e tia n miokoaki ba ena ibuobuoki iaon wakinan te kaitiaki ao barongan te kateitei iaona .



Nte bong ae te Kanimabong 26 Beberuare, 2016, ao a mananga kaain Betio ba ana katabena te kaitiaki iaon te aba aio. A bon mananga kaain ana tiim Betio ae tao nakon teningaun (30) nte tairki ao e raba Te Uea e rangin nakoraoi te managna inanon te karau ma te angae korakora.

Ti butimaeaki iroun tarira temanna are e a kairira nakon te maneaba are ti na tiku iai. Ti karaba riki aron te reitaki ao te amarake are a kakatauraioa tarira ao manera mai Abaokoro i nanon tikura i rarikia. Ti ongo ba a kaman tauraoi ma aia warau-rau ao n tataninga te roko man te moan tairiki ma a oki nako ngke e a baka nako te tai ao a taku ba a ake a te roko.

Ngke e a tia te aroaro i muin tebuina (10pm) ao e a karoaki te nebonebo n te maneaba ao e bon raonira tarira are e butimaira n te tai anne are Nei Karenteang.

E moanaki kanoan te Kaonobong anne ma te rotario, te bau n nanoanga ao ai te neboneyo i matan Te Eukari n te karangaina (5.30am) n irianaki ma te aki mamamatam i nanon te ngaina anne.

Ana taeka Te Uea nakoira bon taekan "Te Tokanikai" are e a bon anganira ungan nanora ni karoan ara makuri ni kabane n te ngaina anne n aron te erere ao te kaitiaki i Maoton te manga.

Maoton te manga ngkana ko taraia mai moa i main ae ko roko iai. Te atimakoro ae bubura riki nakon Abairarang ao e bon aki maekanaki ma iai te maniba ae mam i aona are e bon reke naba kaikana n tain te makuri ao e kabonganaki ranna ibukin te tebotebo n te tai anne.

Te iraorao ni makuri, ma te nanomatoa n te beku n reitaki ma te takakaro a o t e ngarengare a karika te kuku-rei ao a kaunga te nano ni karoan ti-bangara aio. Baai aika a batia a kabebetea te makuri!



E boo te motirawa ni kabuki ao ni mooi n te tawanou anne ba e roko namakinan te kabuehue ae rangi ni korakora. I nanon te titabiba ao te maroro are e a karoaki naba i nanon te tekateka ni katoki kua ao iai namakinan te kabuehue ae rangi ni korakora. Iai ae e namakinna ba titabo ti a menu i nanon te auti te buriki ae bono. N aia titabiba naba ataeinimane ao a taku ba a namakina te kabuehue are e bon taona nako korakoraia n makuri. A taku ba a bonako ni kakaea te ang ba titabo e bono ikeia ao a kakaea nneia ni motirawa are e na reke iai angia. E taowae te makuri ni korakoran te kabuehue are e a korakora riki ngkai ai manga akea te ran ba e bane 3 te baketi ake a uotaki man te maneaba. Iai te nano ni kan kaokaki ataeinimane tabeman ba ana itiran ma e a kangoan kaokakia kioina ngkai e bon raroa ao e a bon roko naba te kainnano irouia.

Ma ti karaba Te Uea ba bon taai aikanne ao e a baka naba te karau ae bebe are e a kamaitoroira ni kabane ao e toki te batakatako ao a maitoro rabatara ao e a manga reke iai te maturung ao te korakora ni makuri. E teirake naba n

te tai anne te makuri ao e a reitinko naba ni karokoa 3pm are ti a manga motirawa i bukin ara bau n nanoanga. I muin te bau n nanoanga ao e a manga teirake naba te makuri ao te karau are e abebete e aki toki n ua muin nimaua (5pm) n te bakantaa bon i main are e nang bo te tai n oki. E bon aki toki te nano. Ti kan kamanira riki ni kaukiang ao ni bikiniki ma e a kan boo 6 n te tairiki ao manga iai kanoan te tairiki ba te nebonebo ma tarira ao manera mai Abaokoro.

#### ***Manangan Fr Teebanako man Betio Parish nakon Maoton Te Maanga, Abaokoro***

Nte bong ae te Kaonobong 19th March, e ka-reke naba mananga Fr Teebanako nakon Mao-ton Te Maanga ao e bon iraki iroun Te Tia Babaire nte NSC ao Te Tiibi Riita mai Betio. Manangan Fr Teebanako e bon kan roko nte tabo



aio ba ai bon tiba moan ana tai n roko iai ao ni kan noria naba ba ea baka ia te kaitiaki are a tia ni karoia kaain te Charismatic mai Betio. A bon tia kaain NSC ma Fr Koru ni moan roko naba iaon te tabo aio n rabanen 2015.

N rokon Fr Teebanako ao e noria ba e tangiraki riki te kaitiaki ae batia ba e tuai n tabanin buburan te tabo ae ena riki ni kaitiakaki. E bon rangin bubura aon te tabo aio e riai naba ni kakaea ki



***'N rokon Fr Teebanako  
ao e noria ba e tangiraki  
riki te kaitiaki ae batia  
.....'***



*"Inanon te ririki aio ao  
ti karaba te Atua n  
teimatoan ana  
kakawakin nakoira n  
ara botaki ae St Padre  
Pio."*


angan rin te booti mai tanrake nako iai ba e rangin ananau te riana nako iai ngkana ko bon toua aon Abaokoro mai tanrio nako tanrake. E ria ni kabaitaki te makuri iaon te tabo aio man tia imain tokin te ririki aio, ao imain te rereua are ena moan karoaki iai inanon te ririki aio.

#### **Kaongora man St Padre Pio**

##### *Uriam Timiti, Suva, Fiji*

Mauri tariu ao maneu n ana tangira te Uea,

Ti reita te neboneyebo ni kukurei ao te kamauri inanon mimitongin Mangautin Iesu n te Bakate aio. Ti riai ni bane n niniaki n te kimareirei ae moan te batu n ana tokanikai lesu iaon te bure ma te mate ao n reken te mangauti ao te kabouaki ae anganira lesu inanon mimitongin mangautina. Ti tabeki naba banara ngaira kain St Padre Pio iaon Suva ni kamauri ngkami ni kabane tarira ao manera inanon ara botaki n charismatic iaon Kiribati, New Zealand ao n tabo ake kam mena iai. Ti karaba naba te Uea ngkai e a manga kaoka nakoira ana baintangira ae Emmanuela-Te Uea ibuakora.



Inanon te ririki aio ao ti karaba te Atua n teimatoan ana kakawakin nakoira n ara botaki ae St Padre Pio. E bon teimatoa te rereitaki n neboneyebo iroura n te Kanimabong ao ni karaoi naba ti-bangara inanon ara botaki are bubura ae Te Kiribati/Rabi Catholic Community iaon Biti. Ti karaba te Tama Ibolito Bakaua n teimatoan ana kakawakin nakoira ngaira kain te botaki.

Inanon ara botaki ae St Padre Pio ao iai kain te botaki aika ataein te reirei ma aia utu ake a roko mai Kiribati, ao iai naba kain te botaki ake bon kain Kiribati aika a maeka i Suva ao Rabi. Bon iai naba kain ara botaki aika taari man te MSC ake a bon tia ni kainaomataki.

N tokin te ririki ae nako ao bon iai kain ara botaki ake a manga okira Kiribati ba Tatoa ma buna ae Nei Rurua ao natia, Nei Teiti ma natina, Nei Ereta ma natina, Nei Tekeua ma natina ao ai Liufuka ma buna ae Terite ao natia. Bon iai naba raora ataein te USP aika a bane aia tai aika a okira Kiribati ba Nei Maingo ma Takenraoi. Inanon te ririki aio ao e bon teimatoa rorokoia tarira ma manera mai Tarawa n raraonira n ara neboneyebo. E bon reke rorokoia irarikira ba te kakukurei ake a kamarurung nakoira kain te botaki. Ni moan te ririki aio ao bon iai teutana rotakin ara bobotaki imuui te cyclone are e orea Biti. A bon maiti kain te aba aika rotaki n uruakin mwengaia ma aia onaroka ao ibukin naba mamaten te iti. Bon iai naba ake a bua maiuia. Kanga iai ngkai taraan

okin te maiuraoi irouia aomata ao e boni rangi ni korakora taian buoka aika e a tia ni karekea te tautaeka ni Biti man taian botaki aika kakaokoro ao aba ma tautaeka n te aonnaba.

Teuana riki ara kanoa ae ti taneiai ni waaki iai bon te neboneyebo ni katoki aoraki ae kakaraoaki n te Kabong are imain te moani Kanimabong. Ti karaba te Uea n ana buoka ma ana kamaiu ae kakatauraioa ibukira n taa iai nako are a tia iai ni kamaiuaki iai aomata aika batu ni ikotaki ma aoraki aika roko mai Tarawa. Bon aio ara riboti ae kimototo mai Biti. Ara inga ao ara katekeraoi nakoimi tarira ma manera ao ara tatato nakon te Atua ba ti na uaia ni kakaonimaki n reitaki n tai nako ni karaoi tabera inanon ara botaki ma te nanorinano, te tangira ao te kakaonimaki. E RABA TE UEA ALLELUIA.

#### **Te Kaongora man St Teretia n Iesu Te Tei**

##### *Fulitura Taraora, Hamilton, New Zealand.*

Mauri tariu ao maneu n ana tangira te Uea,

I aon ara kawa ae Hamilton are e mena n te aono are e aranaki ba te King Country ke n te ara ni Maori bon Waikato, ao e teimatoa ni waki Santa Teretia n Iesu te Tei Charismatic Group, man moan teina n 2007. Ni moan wakina ao a tangiria kain te botaki ba ana ongora iroun Te Tama n te Parish ba e kanga aroia ni waki, a kona n waki ke aki.



E anga ana karaoiroi Fr Frank Eggleton are te Tari Francis ngkoa n St Louis, ao ai ara tama n ara Parish aio n te tai anne. E bon tuangira ba tina waki ma n tatato ian ara auti ni Kiribati ake kain ara botaki. E bon roko naba n ira ara waki n neboneyebo n aia auti Uetoka ma Tabokai ngkoa, ao man anganira ana karaoiroi. E irira naba ni karaoa ara katiki ma Tinara Nei Maria ngke ti kakaraoia. Imuin anne ao tia bon waki ma n oneaki ara tai-bora ni katoa te Toa are Bentekota.

Tabeua te namakaina imuui teina ao Fr Koru, n rokona ikai ao e anga naba ana karaoiroi nakoia kaaina ma ana waki te botaki ake man kainaomataia kaaina aika a maiti n ana auti Taraoa ao Fulitura. N te tai aio ao ti waki n neboneyebo ni katoa Katenibong ao Tabati ian auti ao ni butimai bubuti katoi aoraki ake tia manga reitaki n uota te kamaiu nakoia ian auti. Ti bon moana ara neboneyebo ma te Rotario ma Tinara Nei Maria ao imuui te Bau n ti te Tabati ao tia a neboneyebo naba. Ti kabaia ba iai kunan ara botaki aio are kunan Santa Teretia n Iesu Tei are ti kakaina iai ara neboneyebo. Ti kakaraba Santa Teretia n ana buoka ao raonakira irouna ma ara onimaki ao ara kakoua ba Santa Teretia e teimatoa n karatai

ana rooti aika e boiarara nakoia kain ara botaki ma ara kawa aio ao ake ti bubuti ibukia.

N te tai aio ao aikai kain ara botaki aio: Ara riita bon Uetoka Moreti, ao te kauoman Fulitua Bauro Taraora ao raora aika Naon ao Rotina Baiteke ma natia, Tuana ma Teretia ao aia karo aika Erenete ao Taake, Uetoka ma Tumoa ao aia karo aika Moreti ma Temarewe, Akineti ma Robwata ao Bete ma Nabuti, Teramaki Tawita, Meme ao Tinana ae Florence Murdoch, Margret Muller ma Tinana ae Tiera, Baraoi ao Tabwe Bio.

Bon te katekeraoi nakoimi ni kabane tarira ao manera n tain te Toa aio ao ti reitingkami n taina-ko inanon ara nebonebo ma ara novena aika ti reitaki iai.

## Taeka n reirei

Reirei man ICCRS (International Catholic Charismatic Renewal Services), ana rabata te Charismatic nte aonnaba

Iririba uran te ai -Kanaea ao kamaaka ba ena urarake (Ana rongorongo Christof Hembeger)  
Kateimatoa ao kabutanakoan uran te ai rinanon te maiu n tatato ao n makuri.

*Mai iroun Nei Nenenteiti Teariki Ruatu, St Maria Bikenibeu Parish*

Ngke I  
uarereke ao I  
na nako ni ira  
buakon te  
botaki n kaem  
(camp) are e  
tataneiae ni  
kakaraoaki n  
tain te kabuehue. N te  
tabo aio ao ti  
tataneiae ni  
kakaraoa



kauran te ai ni katoa tairiki ba ara bai ni kakaki botu. Iai ngkanne raora temanna n ara tiim ae kakaonimaki ni katei taian aia ni barongai n te aro ba a na barietata kanga ai aron te auti ae ababaki ao e wai kakang tabona kanga te taua. Ngkana e a kauraki te aia n arona aio ao e reke te uramwaka ae korakora n te aro are e kona ni ngaina ngainana. Ma e bon teimatoa naba kakananean te ai aio ni mwakorokoro ni kai aika a uarereke, teutana i muin teutana ba e aonga n teimaan uran te ai inanon te tairiki anne ni karoko a ngaina.

Iangoan ara kaura ai irou ma raoraou ngke I uarereke are ti a tia ni kakaraoia ba ara bai ni kakaki botu, e oki uringana irou ngke I tabe ni iangoa te boto ni iango ibukin bukamaruan te iubire are e kangai taekana: I muin "Taan kaura te ai" (2012 - 2013) ao "Iririba ao kamaaka te ai" (2014 - 2015), ao ngkai tia tauraoi nakon ara

boto ni iango ibukin 2016 ae e kangai taekana "Kabutanakoa uran te ai".

E rangin bebete aron kauran te ai ke reken te urarake n te ai. Ma kateimatoan uramakan te ai rinanon te maiu aio inanon kaubain ao kaibabarun te maiu aio inanon te tai ae maan bon te bai ae matoatoa karaoana. Ba e kainnanoa te tangingamarau ao te aki barannano.

I taku ba te ai are ti a tia ni muiokoaki iai ba irian te maiu ae boou inanon te Karetimatihi (Charismatic), akea okorona ma ara ai are ti kakaera ba ara bai n kakaki botu inanon au tai n rikirake: ti muiokoaki n anganaki te ai: te waaki n taneiae ma ana makuri te Tamnei ae Raoiroi inanon maiura, ara Ekaretia, inanon ara tai ni maiu iaon te aba. Te ai aio e a riai n urarake ngkai inanora n tatabemanira nako, n uramaka ni korakora. Ibukin aio ao ti riai ngkanne ni katei titiraki aika 3, nakoira n tatabemanira:

Te moan titiraki: Ti na kanga ni kariaia uran te ai aio ba ti na maneaki inanona? Inanon ririki aika a tia n nako, ao ti a tia n rangin kabanea ara tai ni katurua taran ao iangoan te titiraki aio. Man rinanon te waaki n taneiae ma ana makuri ni kabouu te Tamnei ae Raoiroi ni katoa bong. Riki iaon te maiu inanon ana tangira ao korakoran te Tamnei ae Raoiroi. Kainaomatan te Tamnei ae Raoiroi ao kabonganana ana karea te Tamnei ae Raoiroi inanon maiura ao inanon taai aika a onoti ao a okoro riki taai are e kainnanoaki iai ana makuri te Tamnei ae Raoiroi. Waaki n taneiae n aron aikai a kaota otanakon, uramakan ao uraraken te ai n te aro are e na kona n reke mai iai te Kimareirei, ain ana TANGIRA TE UEA e na butinako n te tai ae e waetata, ao uramakan ao uraraken te ai aio e kona n noraki man taabo aika a kiraroa.

Te kauoua n titiraki: Ti na kanga ni kateimatoa uran te ai inanon te tai ae maan? Uran te ai e kainnanoa ae e na teimatoa kanaeakina ba e na uramaka ao e na aki kona ni mamate. Ai bon aron naba ngkanne ara reitaki nakon te Atua. E aki tau ba ti na ti ata ke ni kina kainaomatan te



*"Kateimatoa ao kabutanakoan uran te ai rinanon te maiu n tatato ao n makuri. "*






*“Te reitaki ae teimatoa  
ma Atuara, te onrake n  
te Tamnei ae Raoiroi ao  
maiukinan te maiu n  
tataro n taainako, a  
bane ni kakawaki  
ibukin .....*”

Tamnei ae Raoiroi ke n tii n maiukina te waaki n taneiai ma te Tamnei ae Raoiroi n tii ngaia. E kainnanoaki te raira n nano ni koaua, katuruan te aroaro iaon ao iroun te Atua, ao te maeka iroun te Atua n taainako. Moan baan te kakawaki ba ti na anga ngaira, ti na tautaekanaki ao ni kauki nanora ma ara kantaninga nakon te Atua ni katoa te tai ae koraki. Karaoan aikai iroura bon kateimatoan ao boutokan uran te ai inanora ao iroura ao e na kona ni manena nakon ana kantaninga te Atua are E a tia n iangoia ibukira n tatabemanira nako. Karaoan aikai iroura a na kona naba n buoka ara kekeiaki ao reken te korakora iroura inanon tain te kataki ao te mamara are irian te maiu aio. N te aro ba ti na aki ti rinanon te kimareirei ke buan te kimareirei iroura ma ti na teimatoa n beberake ao ni ikawirake rinanon teimatoan uran te ai inanora n te bong teuana ma teuana. Te reitaki ae teimatoa ma Atuara, te onrake n te Tamnei ae Raoiroi ao maiukinan te maiu n tataro n taainako, a bane ni kakawaki ibukin tiaki ti kauran te ai ma bon ibukin naba kateimatoan uran te ai anne ba e na teimatoa inanon te tai ae maan.



Te kateniua ao te kabanea naba n titiraki ibukin te tai aio: Antai ae riai n ura te ai ibukina? Ao ngkanne tia manga titirakinia riki. Te Atua e a tia n anganira te onimakinaki ibukin te ai anne ba ti aonga n namakina te namakin ae tamaroa ke n raoiroi, ao ti na kukurei ni maeka inanon te katanaki ni koaua n makan te Atua inanon ara botaki n tataro aika a kakaokoro? Bon tiaki ao tiaki! Ma e koaua ae Tamnein te Atua e inaomata n tiku iroura n te aro are E tautaekani maiura rinanon korakor makana, ana kimareirei ao ana rau ni katoa te bong ae koraki. Ma tiaki aio tokin taben te Tamnei ae Raoiroi ba ai tiba a na moan tetere! Ti bane n weteaki n arora aika a kakaokoro ba ti na tiba ao n kabutanakoa uran te ai aio! Ti na tiba naba karaoan ana makuri ni mitinare lesu ni kamaiua tarira ma manera man te kabureaki ni bai korakin te maiu ao te aonnaba aio, ti na buokia naba mataki ba a na kona n noraba, ao ni buoka naba kainaomataia tarira ma manera ake a teimatoa ni maeka inanon te rawawata ao te raraoma, ao ai bon tibatibakin ao

kabutanakoan te rongorongo ae raoiroi nakoia tarira ma manera n te aonnaba ae e banin ake a teimatoa n taka ao n kainnanoa ana Tangira te Uea (nora Ruka 4: 18 - 19). Ti teimatoa ni maeka n te aonnaba ae e tangi ni korakai ao ni kainnanoa ana Tangira te Uea. Ibukin aio ao moan baan te kakawaki karaoan ao makurian tibatib anao kabutanakoan te rongorongo ae raoiroi. Ma ti na kanga ni karaoa ao n kakoroa nanon aio n te aro ae e kororaoi ao n tamaroa? Imain ae tii kaeka te titiraki aio ao ti riai naba n tara ao n kaeka te titiraki ae teuana aio: Inanon maiura aio, ti a tia n taua uran te ai i bon iroura? Ngkana ti a tia, ao e kakawaki ngkanne te manga raira n nano ni koaua ao kabouuan maiura ma te Uea. Karaoan aikai iroura bon manga kaukan kawaira nakon kakawakin te maiu ibukin te Uea ao te toronaki ni koaua irouna ao riki bon atakina iroura ni koaua, nnra ke te tabo are e a tia ni baireia te Uea ibukira n tatabemanira nako. Reken aikai iroura bon kabonganakira naba iroun te Uea ba ti na riki ba a na taan kakoaua ao ni kakaota kamimin ao kororaoi ana Tangira te Uea n te aonnaba ae banin. E angi irouia ara koraki aika a kai toki ni kakarabaia n te koona teuana ni maiukini maiuia n tataro ao a katinanikua te aonnaba iakuia. Ma n au koaua ao tiaki aio ae e tangiria te Uea mai iroura. Ngke e rineira ao n weteira te Uea ba ti na riki ba kaain te aonnaba aio, ao e rineira ao n weteira naba ba ti na riki ba a na taan kakoaua ibukina. Ao mai ikanne are ti a kona ngkanne n tibai ongora ma baike a tia n reke iroura rinanon ara reitaki ma te Uea ao rinanon karaoan makuri ni ibuobuoki nakoia te koraki ake a maeka irarikira.



Ngkai ti tabe n borauakina kawaira nakon koron ara iubire n te ririki 2017 ao I tangiria ni kan kaungai ngkami e moa man te bong aio ba ti na kawakina uran te ai are e a tia te Uea ni karoko urana iroum ao irou inanon maium ao maiu. E na ti kona n reke aio rinanon maiukinan te maiu n tataro ni katoa bong ao kateimatoan te reitaki ae kakannato ma ara Tia Kamaiu. Karaoan aikai iroura bon karekean naba ara tokanikai iaon karekean teimatoan uran ain ana Tangira te Uea are e a tia ni kaura iroura. Ngkana e reke aio ao ngkanne ti a tiba kona naba ni karekean te tokani-

kai iroura n tiba ao ni kabutanakoa uran te ai aio nakoia tarira ao manera ake a kainnanoia.

### **Te Manga kabouaki inanon te Babetitoaki n te Tamnei ae Raoiroi**

**Uriam Timiti, St Padre Pio. Suva Fiji.**

Bon iai ngkai te kakatauraoi ae wakinaki n te aon-naba irouia kain te charismatic ibukin butimaeana ka-50 n lubire te charismatic ni waaki inanon te Ekaretia, ae na karaoaki n te ririki 2017.

Ti bon ata aron kakawakin ao kainnanoan manga kabouan rangan ao baron te Tamnei ae Raoiroi ba kanga te Bentekota ae bou ae na kabouira ngaira ni kabane ao ni kaboua naba te Ekaretia. Ti ataa ba inanon te moan Bentekota ao e noraki aron uraraken ain ana tangira te Atua inanoia moan kain te Ekaretia n aia kakamakuri ao ni korakoraia ma ninikoriaia n tataekina te Rongorongo ae Raoiroi nako tokin aonnaba.

Tariu ao maneu I taku ba bon aio te tai ae rangi n angaraoi ibukin te katauraoi ni butimaea kororaoi te kamaiuaki are anganira lesu inanon te Batake. Ba E kaboira lesu mai iaon ana kaibangaki ba ti aonga ni manga riki ba Naati ngaira ao tani baibai Irarikina i Karawa. Ba maten lesu iaon te kaibangaki kanga bon te karea ni kamaiuaki ae akea boona nakoia aomata ni kabaneia. Ma ti uringnga ba imuun mangautin lesu ao imain waerakena nako Karawa ao e tuanggia ana abotoro ba e riai n nakon Tamana ba E aonga ni kaoka te Tamnei ae Raoiroi ae te Tia Ibuobuoki ao te Tia kakoroi bukin bai ni kabane. Are nanona ba kororaoi te kamaiuaki e a kakoroaki raoi iroun te Tamnei ae Raoiroi.

Tariu ao maneu ti na kona ni manga kaboua raangan ao baron te Tamnei ae Raoiroi n te Ekaretia ngkana a tauraoi nanora ni butimaea Tamnein Te Atua. Te tauraoi aio bon kaukan nanora ni butimaea te Tamnei ae Raoiroi. Teuana tamnein te Bentekota ae rangi n teteke iai nanou bon tamnein taian newe aika toka iaon atuia abotoro ma reirei ao tan onimaki ake a tataninga n tiku i lerutarem n te ruu are ieta ma Nei Maria. Man tauraoi ao ukin nanora ao e na ruonira te Tamnei ae Raoiroi n aiaron te newe ae na toka iaon atura n tatabemanira. Ngkana a aki tauraoi nanora ao e na bon aki ruonira te Tamnei ae Raoiroi.

Ngkana ti kaonrakeaki n te Tamnei ae Raoiroi ao ti na namakina te bitaki ae korakora inanon maiura ni kan kauea lesu ao ni kan kakaraoa Nanona n te aro ae ti kakoaua ba E mena te Uea inanora ao ngaira ti mena inanon te Uea ao ti riki n ti teuana ma te Atua.

Ti na kauki nanora n te tai aio nakon marewen ana kantanninga te Atua ibukira are bon mamaekan ao kakamakurin Tamnein te Atua inanora ba ti aonga ni karekea te maiu ae Onraken te Maiu. Inanon kabouan te babetitoaki n te Tamnei ae Raoiroi ao ti riai ni manga kabouaki n ara kekeiaki ni kabuta te Rongorongo ae Raoiroi nako tokin aonnaba ao ni babetitoia aomata n

aran te Tama, te Nati ao te Tamnei ae Raoiroi. Ti riai ni kabouaki n ara motinnanano ao ara anganano ba ti na ongataeka iroun te Tamnei ae Raoiroi. Inanon te kabouaki aio ao ti na bon riai n teimatoa n onimakina lesu ba bon raora n tai nako n aron are E berita iai imain waera-kena nako Karawa ngke e kangai, "Ao noria Nna bon memena irarikimi ni karokoa tokin aonnaba" E bon kakawaki iroura n te tai aio ba ti na karakai ara kekeiaki ao ara motinnano inanon maiura ni kiritian ni kaotia ni koaua ba ti tangira lesu. Ao ti kaoti ara tangira n ara tauraoi ni kaburei ao ni katabui maiura ibukin karoakain Nanon te Atua. Ti riai ni butimaaiai ana karea te Tamnei ae Raoiroi ao man tauraoi ni kakaonimaki ni kabonganai karea aikai ibukin neboan Rabatan lesu ae te Ekaretia. Ti riai ni kaboui ara anganano inanon ara botaki ni charismatic n riki ba tan tataekina te Rongorongo ae Raoiroi ao ni kaotia nakoia aomata nako ba e bon Maiu ni Koaua lesu ibuakora, Alleluia, Alleluia. Te wewete ibukin kabouan raangan ao baron te Tamnei ae Raoiroi inanon te Ekaretia bon te bai e a bon rangi ni kakawaki riki n te tai aio ngkai ti waaki inanon Ririkin Ana Nanoananga te Atua. Ti riai ni kaotia n ara makuri ao n ara kekeiaki ba ngaira kain te charismatic bon tani karokoa ana Nanoanga ma ana Kamaiu te Atua nakoia aomata nako. Tina butia tinara Nei Maria ba e reireinira ao buokira n ara kekeiaki ni kabane ba ti aonga ni kakukureia ao ni kakaraoa Nanon Natina ae lesu.



## **Ana Tangira Te Uea**

**Ana Tangira Te Uea nakon Nan Taakai Taburira  
Nenenteiti Teariki-Ruatu, Bikenibeu Parish**

Bon ngai naba temanna ae I a tia ni kamaiuaki n ana tangira Te Uea man aorakin tamneiu.

N tairikin te kabong 14/12/15 ao ti kaoaki nakon te katoki aoraki n aia auti natira i Bikenibeu ba ti na reitia ao are ti a riki naba ba aoraki i rarikia. Bon akea nanou n te katoki aoraki n te tai anne ma I kubanako ao I mimi n aia noraba taan katokabai ba a nori irou baika I bon kakoauai are I taku ba a bon aki atai.

- I. Te bau ae te naeta (3 mwaitin tiaian naeta aika a uarereke are a tomatomaki ao a bane takarakaroia n ai aron te biti ae te kaoba (copper) ngkana e roko raoi n kabuebuena - ura - aoranti karana) are e beibeti ao i muina e a noraki n toka iaon atuu ba au bau - I kakoaua aio i bukina ba e a bon tia naba ni katokaki maeu ba bonotau n te katei n aon te aba.
- II. Uoman aine aika a tei irariku ao araia are a

*"E bon kakawaki  
iroura n te tai aio ba ti  
na karakai ara  
kekeiaki ao ara  
motinnano inanon  
maiura ....."*



*"Tenana te katoto are I  
kona ni karakinna ba  
n te taina n au tai ni  
buti naba ni manging ao  
I a kakioaki naba  
ironua bureitiman...."*

kaotaki nakoia kaain te botaki bon ainen Maiana - I kakoaua naba aio ba I bon karoaki ni bain Maiana ao bon iai 2 aine aika I aki toki n nonoria.

Man nonori aikai ao I a kaoaki nakon te katokabai are e na manga karoaki n te Umantabu ae Santo loteba i Bikenibeu n tain aia reitaki kain te karetimatiiki n te Bariti aio n te Tabati ae 17/12/15.

- I nanon au tai n roronga ao I rangi ni baina te manging ao te raraun n te rebwrebwe. I ngae ni buti ni manging ma I bon tuai naba man kabuanibai n te rebwrebwe ba iai aika a aki toki ni kawakinai n au tai ni buti.
- Teuana te katoto are I kona ni karakinna ba n te taina n au tai ni buti naba ni manging ao I a kakioaki naba ironua bureitiman. E bane butiu ao n au ururing ao e bane wiin te neiran ni buti ba e bon bane raoi butin te rebwrebwe. I ataia n te tai anne ba a roko uoman aine n toka n au rebwrebwe ao temanna e taua bwen au rebwrebwe. I buti n aki tukaki iaan bukina ae riai ma ngke e a bane baan au rebwrebwe ao I a baka ni wene irarikin te kawai ao a tiba roko bureitiman ba a na katikai. A kantaningaia ba nna ikoaki ma I aki ba I bon tabe ni matu irarikin te kawai.

N te ingabong n te kaonobong i muin te katokabai n aia auti au koraki nataei i Bikenibeu ao I uti n nako Betio ngai ma buu. N te tai anne ao e a a manga roko nanou n rawa ao ni maka te katoki aoraki n te tabati n te bong are i muina ma I aki tutuanga buu. E rimoau buu n oki nako Bikenibeu ba e a batia ao ngai nna rimuina n te reberebe. E bakantaa ao I a reberebe n oki. I a kan roko n aia auti au koraki nataei i Bikenibeu ba I a baka iaan te makoro ae te Bonnano. Inanon butiu ao I a bon ongo naba te bana I tangingau ae e kangai - OKI NAKO BETIO. I a bon oki naba n te tai anne n okira Betio ao I aki roko ni kawai i Bikenibeu. I karaurau ni buti ma ngke I a roko i tabon te causeway i Bairiki ao I a moana naba au kabubuti. I kubanako ngke I a kabubuti ba I a bon ti nora naba te kaa n kaoti n te tai ae I aki kantaningaia iai ni buti rimoau ao ibukina temanna te aomata ae ababaki nako karawa. I aki noria ba e toki iaa abakina n te aro are I aki bae n nora kawai ao I a kurati naba. I kiba ao I rabinobino n aki akaka inanon te kawai ao te kaa are I kurati ma ngaia e bane titibana n butinako n aki tiku ni buokai. E raba te Uea ba e reke rukou ma ikoaki n aia auti au koraki nataei ake tabeman i Betio ao a uotai nako Nawerewere n te tairiki naba anne. A bon batia riki au tai ni bubuti ni manging n te reberebe n akea au kanganaga ma ngke I roronga ni karokoa ai rorou aio ma bakau n te reberebe n tairikin te kaonobong anne ae 16/01/15 bon te bai ae e rangin kubanako iro.

E aki reke irakin te katoki aoraki n te tabati anne i Bikenibeu ma e a reke iro n te Tutia n reitaki n nebonebo ao ni katoki aoraki n Te Kaotitaeka i



Betio n 24/01/2016. I namakina te kukurei ae moan te batia n tain te katoki aoraki ao e rota nanou n te aro are I a bon tauraoi n raira nanou ao ni bita maiu. I muina ngke I a okira au auti ao I a anai au boki n aon te aba ao I raeraei baaia ake kanoan ana waaki te riaboro ao ni kabuoki. A tiku kanoan au boki ake bon ti ibukin te bai n aoraki n Kiribati ao I a moana naba au tataro man te bong anne ni karokoa ngkai. I a Kawenea naba ba banaau ni bubuti ngkami tariu ma maneu ni kabane inanon te botaki n karetimatiiki ba kam bia reitai ao n uringai inanon au kekeiaki ao au raira n nano nakon te UEA, n ami tataro. E raba te UEA.

#### **Ana Tangira Te Uea nakon Nei Teuota Ubanaba**

#### **Nenenteiti Teariki-Ruatu, Bikenibeu Parish**

Kam na bane n mauri n Ana Tangira te Uea! I kan tiba naba kamaiuakiu ao riki bon kamaiuan tamneiu iroon te Uea.

Ngai temanna ae I a tia naba ni kaman kaitiboaki ma kaubain te botaki n tataro n karetimatiiki ma ngke I ataeinnaine iaon te abamakoro ae Abemama. I ira naba buakon te moan tetere ni irirakin te botaki n tataro aio iroon te Tama Ekirin iaon Abemama. Ma inanon ririki aika a maiti ao I a tia naba ni manga mamara ao ni bua, n te aro are e a moanibai naba iro makurin aon te aba ibukin au maie, aoraki tabeua ake I a tia ni rinanona ni ikotaki naba ma waakin te makuri n katantan iaon te aba, iro ma au utu. N rokon ara katekiti ae Terikaua inanon ara makoro ae Nei Kau inanon te ririki ae 2014 - 2015 ao e a manga kaunga maiun te botaki n tataro ae te karetimatiiki inanon te ririki ae 2015. Ngai temanna are I a manga iaiangoa ao ni kamarurunga naba irirakin ara botaki aio inanon ara makoro aio n te tai are e a manga kakamaiuaki te botaki n karetimatiiki.

Ana tangira te Uea nakoia ma au utu ao riki tao bon ngai n te tai aio, e waaki man raabanen te namakaina ae Novemba 2015 inanon mwengau. Bon kawarakin mwengau n te tairiki anne irovia kaain ara botaki n karetimatiiki n au makoro. I rangin kubanako ba kanoan te nebonebo n au auti ao I a noraki n tekateka ba temanna te aine ae e buburakaei iaan au baranta n te aro are atuna e kuri boo ma kaban au baranta are ti nebonebo iai. E makoroua noran rabatau n te tai

anne ba iterau teuana e rangin tamaroa ao akea te bitaki nako iai ni ikotaki naba ma iteran ubu. Bon teiu ae ngkai ma kanga e a rangin raka riki tamaroau ao I rangin moa itiaki. Ma iterau are teuana, e a kaokoro tarakin kunin rabatau ba kanga e kirin roo ao kunin rabatau aio mai roroau rikaki nako aon baiu ao taabo n kabane ake a kona n noraki n iterau aio, kanga iai inaia (titabu inan kuniu are e toka iaon rabatau n te tai anne kanga ai aron kunin te raakon, ao e kirin roo matana (colour) n aron are I a tia n maneweia). Kanoan matau n au itera are e raoiroi e rangin tamaroa ma kanoan matau n au itera are e kirin roo matana, e takarokaro n uraura ao e kuri n akea karoromatau ae e noraki.

I bon kubanako ao I mimi n aia noraba taan nebonebo n mwengau n te tai aio ake a nori irobukina bwa I taku bwa akea te bai ae e kona n ataki n waakin mwengau.

- I. Te nonori are e noraki iroo iai koauana ba e ngae ngke I a waaki inanon te botaki n karematiki ma I teimatoa naba n onimakina makurin bain aon te aba ibukin katanaki ma au utu man ana makuri te riaboro. Wiiki ake mai maina ao e baka n aoraki buu n te aro are ti a biriakina kakaeao ao karekean marurungina man te makuri n aon te aba. I buoka ao ni boutoka naba buu n ana bai n aoraki aio n te aro are I a kariaia naba karaoan te makuri ni bonobono n bain aon te aba.
- II. I kakoaua naba ba I a tia naba ngai ni kakabonganai bai n aoraki n aon te aba inanon taai ake I kainnanoi iai.

Man nonori aikai ao I a kaoaki nakon te tutia n reitaki inanon te karematiki are e karoaki n te Parish i Bikenibeu n te Umantabu ae Santo Ioteba n te bong ae te Tabati ae 6/12/15. I karaba te Uea ba e reke naba aia tai tariu ma maneu inanon te reitaki aio n katoka bai iaou inanon tain te katoki aoraki n maneaban Bikenibeu Parish ae Santa Maria are e a manga kauataao naba te korakora are I kona n namakinna inanou.

I teimatoa naba n ukeukera raoi ba tera raoi nanon te Uea iroo man taian nonori ake a tia n noraki i r o u n mwengau ao inanon te katoki aoraki inanon Santa Maria man e a b a . I robukin aio ao I rorokoko naba iroon te Tama Koru n tibai baai ake I taku ba I kainninoa iai ana ibuobuoki ma ana ka-

matata riki. I karaba te Tama ba muin au reitaki ma ngaia are e anganai riki te korakora ao te nano n kamatoatoa ni buakani baai n kabane ake I a tia n rinanona inanon maiu ma au utu.

I bon teimatoa naba n kakorakorai n maiuakina te tataro man te tai anne n karokoa ngkai. I kukurei naba ba iai te bitaki ngkai ae I a kona n noria iroon buu ba e a moanna n uki nakon te tataro ao riki bon ana kekeiaki naba n irira te tutia ni katoa bong. Ngkai I a karaoa au course ae “Te Maiu ae Onraken te Maiu” e moa man te Moanibong (14/03/2015) n te wiiki aio. E raba te Uea ibukin au kekeiaki aio ao I teimatoa n bubutia ba e na buokai ni kakorakorai ba nna tokanikai nakon are e tangiria mai iroo. E rabwa te Uea!

#### **Ana Tangira Te Uea nakon Kukua, kaain Betio Teburoburo Eita, St Faustina Betio Parish**

Arau Kukua ao I mamaeka n te makoro ae Tiantaake i Betio. Aran buu Nei Tina ao ai 7 natira. Iai aorakiu n taai aika a nako are I taonaki iai ao I aki nakonako ba I aki namakini rangau ao I aki kona ni kamakuri i nanon uoua tabun namakaina. N Nobemba 2015 ao I butimaea ana tangira Te Uea rinanoia kain te tiim ni katoki aoraki man te Karetimati ake a kawarai n au auti.

Iai miuu i main ae I baka n aoraki ba I miiu te unaine ae e roko ni katuka ana batoro ni konan au auti. Te kamimi ngkanne ba te bong are i muina ao e kawarai te unaine anne ao e tekateka ni konan au auti are I noria ba e bon roko naba iai n te mii. Bon tenibong ana bong ae ireiti n roko n au auti ao n tekateka n te koona anne ma I aki rangi n tabe iai.

E aki maan i muina ao I a baka n aoraki ba e taonai te maraki ni biroto ao e maraki naba rangau are te angatai. E rikirake ni korakora te aoraki ao n tokina I aki kona n nakonako ao I a tiku ba te mauku i nanon 2 tabun te namakaina ngaia are I a bubuti buokau man te charismatic.

N tain te katoki aoraki are e moanaki ma te korona, te bau nanoanga ao te nebonebo ao a noraki aoraki irovia kain te tiim aio;

- ◆ Iai ae e namakinna ba e ibe moantiau ao iai te bai ae e tibu iai – I kakoaua aio ba bon aoraki teuana te maraki ni biroto ba are I aki batu ni mimim ao ngkana I a manga mim ao I maraki
- ◆ A nora naba te unaine ae e roko ma uotana te batoro ao e nikiria ni konan au auti – Aio are I bon kakoaua n aron noran te unaine are e roroko ao n tekateka ni konan au auti i main ae I baka n aoraki. I bon uringa naba ba i nanon aoraki ao I aki toki n tatangiria ni wene ni konan au auti aio ao n titiku iai kanga ai aron ae e katitikaki nanou nako iai

I nanon tain te katoki aoraki ao I a bon namakina naba te bai ae e tinebu ni kounako man rabatau ao I namakinna ae e a bebete aron te kakamakuri



*“I bon teimatoa naba n  
kakorakorai n  
maiuakina te tataro  
man te tai anne n  
karokoa ngkai.....”*





i bon irou. Ngke I kataia ni kamainga rangau ao e a bebete ai tiaki aron tinebuna ma e ngae ngke tuai ni maing n te tai anne ma I kakoaua ba l a buokaki ba l namakina bebeten rabatau. I a kona naba ni kakamakuri n aki buokaki. I a kona n tekateka i bon irou ao l a kona ni kamakura waeu are l bon aki kona mai maina. E rikirake bebeten rabatau ao l a kona ni kakamakuri n akea au kanganga ao teuana raoi te wiki i muin te katokabai i aou ao l a nakonako n akea te kanganga.

N te tai aio ao l a rangi ni marurung ao ni manga reke au makuri. I neboa Te Uea ao l katituaraoia n ana tangira ae moan te batu ngkai e a tia ni kaoka marurungiu ao ni manga anganai au makuri. Bon ti ngai ae l makuri ao bon ti ngai naba te tia kareke te maiu i bukia kain au utu are a bon bane n rotaki ngke l a baka n aoraki a n aki kona te makuri.

Mai muin te tai anne n aron tuangara irouia kain te tiim ao ti na teimatoa n reitira n te korona ni katoa bong. Ngkai ti a teimatoa ni kakaraoa tabera aio ni katoa bong n te ingabong ao te tairiki koraki. E raba Te Uea

**Ana Tangira Te Uea nakon ana botaki n Charismatic Abaokoro**

**Teburoburo Eita, St Faustina, Betio Paish**

Inanon kawarakin Abaokoro irouia kaain Betio ibukin te kaitiaki iaon te atimakoro ae Maoton te Maanga ao e bon reke te tai n neboneyo ke te reitaki ma kaain te kaawa aio. Inanon te tai n neboneyo ma kaain Abaokoro ao e karoaki naba te katoki aoraki ma te kamarurung n ana Tangira Te Uea. Ti karaba Te Uea e rangin batu ana Tangira aika a raba maiiroura n tainako. Inanon te tataro n katoki aoraki ao aikai ana tangira Te Uea aika a tibaki ao man noraki naba te marurung imwina;

- Te maraki n nuka -iai ae e namakinaki aorakin marakin nukana ao e kakoaua ba e bon kai nukana n te tai anne
- Te maraki n anga - temanna are e maraki angan baina ae e a rangi ni maan ba e a ririki tabun ao e aki kona n tabeka baina nako eta
- Te maraki n roroa nakon babana - e maraki roroana ao rikaki nakon babana ao angana
- Te aoraki n aine - iai ae e noraki ba e nanako te ran man ainena ao e bon kakoaua te aoraki ba aorakina te waiwai ae e aki rangi n ataki ba e bon kakaina aorakina irouna
- Te tia korokarewe - e noraki manera temanna are e bon koteaki i nanon te tai anne ba e korokarewe ao iai temanna irarikina ao tein ae iai rabakauna n te korokarewe. N

ana tibatia te aoraki ao e kakoaua ba bon iai ongona n te korokarewe are e bon reitaki ma te bai n roo ao e taku ba e nang katoka kabonganana man te tai anne.

- Te maraki ni biroto - e noraki n te namakin iroun Nei Karenteang ba iai te bai ae e ibe ao n tiku ni birotona ao e kakoaua ba e bon namakina te bai ae bai ae bubura kanga te atibu ae e kouanako mai nanona.

Te bai ae kakakurei riki bon katean aia taibora tarira ao manera n charismatic i Abaokoro. Bon ana Tangira Te Uea ae raba, ba e bon aki ataaki aio ba ena karoaki inanon kawaran te kaawa ae Abaokoro. Bon iai ana babaire Te Uea ibukira aika araba ao aika tiaki noori. Nte tai aio, ao ea manga tei ana taibora Abaokoro ae boou ao aikai kaaina aika manga tia n anganaki te mioko iroun Te Uea n aron tamneia ae inano ma aia Tiibi Riita ae Nei Agela ao ana kauoman ae Nei Karen-teang. E RABA TE UEAI ALLELUIA ALLELUIA



**Ana Tangira Te Uea nakon Nei Nnakina iaon Auckland, New Zealand.**

**Teburoburo Eita, St Faustina Betio Parish**

I karaba Te Atua ma tinau Nei Maria n aia tangira ae moan te batu nakou.

E a kaman kakai nanou ni kan kakaea tamnein tinau ma e a tiba reke angana n 29/11/15 ngke l a butia raou ae Stephen ba e na nikirira n te mall teuana i aon Henderson - West Auckland. Bon ngai ma natu ae Ronete n ririaki ni kakaea ma e ti reke are tamneina ma lesu ao loteba ae uarereke ma akea are l bon tangiria are ti Nei Maria.

Teuana te bong i muina - te moanibong 30/11/2015, n ana tabo ni makuri Stephen ao e roko temanna te tia karao tamnei (statue) ni kan buokaki nakoina ao i muina e a tuaga ba e tangira tamnein Nei Maria ae e toba lesu te tei ke e aki. E oki ana iango Stephen n te tai naba anne nakon au tamnei are l rangi n tagiria ao e butimaea Nei Maria ma te mimi ae batu. Raou aio bon akea ana aro ba e bon aki onimakina Te Atua ma e a bon rangi ni mimi riki ba e a maan ni makuri ao bon akea ae e a tia n roroko ni bain-tangira tamnein Nei Maria ao lesu nakoina n aron aio.

Ngke e okira te auti ao l a bon teirake naba ni butimaea tinau ao ni karaba ba l kakoaua ba e bon nora nanou ao e a bon roko ni kawarai - ma ai tiaki ti ngaia ba bon ngaia ma natina ae lesu! A rangi ni batu au kanganga i nanon tiku ikai ao teuana mai buakon buokau ake l anganaki bon

*“N ana tibatia te  
aoraki ao e kakoaua ba  
bon iai ongona n te  
.....”*

te korona ao te Bau n nanoanga. I aki toki naba ni bubutia aomata ba ana reireiai te tataro n reitaki nakon tinara ao e raba ba taran ae e nang tabanin raoi ngkai au koaua.



E rangi n unga nanou n au boki n tataro are uotia Roro ao manga rokon tinau i rariki ma natina are lesu e a kakorakora ao ni kaunga riki nanou nakon te maiu n tataro. I bon kakoaua ana tangira Te Uea nakoui ae moan te bat i nanon tiku ikai ma e ngae ngke e tuai n rinanon au kanganga ae I rang kainanoia ma I onimaki ba ngkai e a bon roko ma tinana i nanon mwengau ao e na bon kaekai n te tai are e angaraoi mai irouna.

Ngai bon te kamatu ae I rangi ni boou i nanon waki n tataro aikai. Te aine naba ngai ae te kabanea ni karietata ae I bon rarawa n tataro ba bon te bekan ngai ni koaua ae I a bon tia n tannanko mairoun Te Atua i nanon te tai ae e a rangi ni maan. N te tai aio ao e a rang unga nanou n tataro ma tinau ao au tataro ae I aki toki ni kakabongana ngkai bon te korona ni katoa ingabong, te bau n nanoanga ni katoa 3pm ao n te tairiki I ana te tataro are 15 are ana tataro Santa Biritia ao I kakaraoa naba au rotario n novena are 9 te bong ni katoa namakaina.

A rangi ni maiti bitaki ae I a kona n nori n te tai aio ngkai I a maiuakina te tataro. I a noria ba I a tia n rangi ni kairua n taai aika nako n anuau ni kabane ao I a rangi ni kukurei n tataro ni katoa bong. Anuau are te karietata I a rangi ni kona n taonna ao n tabetai ngkana I bon aki kona n taonna ao I tara tinau ao e a bon anganai naba raun nanou n te tai ae waekoa. Arou are te tabeaianga ma te raraoma ni katoa bong i bukin au kanganga ikai a bon toki ba I onimakina ana buoka tinau n aron are e bon tuangai ni kaotina nakou i te mii n taai aika a nako ao riki ngkai e a bon roko rabatana ma natina i nanon mwengau. I rangi n namakina naba bitakin raou aio n aron rakan ana ibuobuoki nakou.

E raba Te Uea ao E na neboaki n ana tangira nakoira n taai nako

## Te Maiu ae Tabu

**Fr Tuckwell ma te tataro ae "Ko na mauri Maria"  
Teburoburo Eita. St Faustina, Betio Parish**

Temanna te teinimane ae ai tiba 6 ana ririki ao kain te aro ni Borotetanti e rangi ni mamataiakinia raoraona aika Katorika ngkana atonga "Ko na mauri Maria". E rangi ni baka nanona iai ao n tokina e a kaewea taekana n ana beba teuana ao e a kamatenikuna man atoatonga ni katoa bong. N te taina ngke e tabe n atonga ana tataro aio ao e a roko naba tinana irarikina ao e aki tabara ma e a tuanga naba ni kangi "Tinau an bon nora te tataro ae moan te tikiraoi aio!" Ma e un tinana ao e tuanga ba e na aki manga oki n atonga ba bon ti aia tataro Katorika ake a taromauri boua n anti ao arana Maria are ti te arona ma aine nako. E tuanga naba natina ba ngkana e kakewea ao e na noria n te baibara ba a bane i nanona baike a riai ni karaoaki. Man te bong anne ao e aki manga atonga "Ko na mauri Maria" te teinimane aio ma e a kabanea riki ana tai ni wawareka ana baibara. N te bong teuana ao e kunea n te baibara rogorongan ana **kaotitaeka te anera nakon te Aine** ao e onrake nanona n te kukurei. E biri nakon tinana ao e tuanga ba e a kunea "Ko na mauri Maria" n te baibara ae kangi raoi taekana - **Ko na mauri ngkoe ae ko on te karatia, E mena te Uea iroum, Ko karaoiroaki ibuakoia aine.** E a kakoaua ba ngai bon iai taekan te tataro anne n te baibara ao e aera ngkai e aranna ba te tataro ae akea nanona?"

Imuina riki ao e a manga kunea ana karine Eritabeta nakon Nei Maria (MAGNIFICAT) are e taekina naba iai taekan Maria are ana bane roro nako n atonga ba E kabaia. Ngke e nora aio ao e aki manga kaitara tinana ma e a manga katoa bong n atonga **"Kona mauri Maria"** ma te kukurei. E taku naba ba manewena bon taeka aika rangi n tamaroa man kakateke nakon tinan lesu are ara tia kamaiu.

N te bong teuana ngke ai 14 ana ririki ao e ongongora n aia maroro kain ana utu are a bai ni ngarea iai Nei Maria n taeka aika bat. E rikirake nanona ni irantanga ao e kaekai ma te bana ae matoa ni kangi, "Maria bon tiaki aroia natin Atam ake a boo n te bure! E aranna naba te anera ba **E onrake n te karatia ao E karaoiroaki i buakoia aine.** Nei Maria bon tinan lesu Kristo are nanora ba bon tinan Te Atua. Bon akea riki te nne ke te tabo ae moan te rine man rietata ae kona ni karietaki te aomata nakon anne. E taekinaki n te Evangkerio ba ana bane roro nako n atonga ba e a kabaia ao ngkami kam kaenana man kamangoaria ao ami koaua e rangi n okoro ma te Evangkerio ke te baibara are kam taku ba e boto iai te aro ni kiritian!"

A rangi n rotaki nanoia n ana taeka ao riki tinana are e takarua ma te korakai ni kangi: "O Ataua, I a rangi ni maka te bong are e na kona iai natiu aio n rairaki nakon te Katorika are aia aro Bobe!" Ao e bon koro bukina ba e aki maan i muin anne ao te



".....kain te  
aro ni Borotetanti e  
rangji ni mamataiakinia  
raoraona aika Katorika  
ngkana atonga "Ko na  
mauri Maria".



teinimane aio e a reirei man kamatebaia ana koaua n ana aro ma ana koaua te Katorika ao i muina e a rairaki man riki ba temanna te abotoro ae moan te kakaonimaki.

E aki maan i muina ao e kaitibo ma manena are e kaota naba aki kukureina irouna ngkai e rairaki nakon te katorika ao e tuanga are e raoiroi riki ni kaman tiringaki ngke e uarereke nakon ae e na karaoa aio. Ma e ngae ngke e korakora unna ma ana kairiribai ma e bon bitaki naba ana iango n aron naba Santo Bauro i aon kawaina nako Tamateko.

N te taina ao e baka n aoraki natina te mane ao e aki reke buokana man te onaoraki. E roko manena aio ni karaua nanona man kangai nakoina, "Maneu ae ko tangiraki, I ataia ba ko tangira natim ba e na marurung ngaia are nna butiko ba ko na karaoa te bai ae nna tuangko. "Ti na tataro n ana teuana 'Kona mauri Maria' ao ni berita nakon Te Atua ba ngkana e marurung natim ao ko na reirei kanoan te onimaki ni Katorika ao ngkana ko a kunea ba e koaua ao ko na rairaki n aki manga tabeaianga ni bai ni kabane."

E bon rawa iai ma i bukin tangiran natina ao e butimaea ana iango manena aio ao e tatarona 'Ko na mauri Maria' ma ngaia. E marurung natina n te bong naba are i muina ao e kakoroi bukin ana berita ni kabane – e reirei kanoan te onimaki ni Katorika. I muina ao e a babetitoaki ma ana utu ni kabane ao n rangi ni kakaitau nakon manena are e a tia n rangi n ribaia.

Te teinimane aio e riki ba te katorika ae ma-toatoa ao reitinako nanona ao ni manga riki imuina ba berebitero are e kinaki n arana ae te tama Tuckwell. E aki toki ni kaungai nanoia aomata ba ana teimatoa ni korona ao n atonga te tataro ae moan te tikiraoi ae Ko na mauri Maria ni katoa bong ao ni butia ba E na kaotai nanoia aika teimatoa ni maenako ma ana Ekareta natina are lesu Kristo ni koaua.

*"E bon rawa iai ma i bukin tangiran natina ao e butimaea ana iango manena aio ao e tatarona 'Ko na mauri Maria' ma ngaia..."*



## Titiraki ma Kaekaia


### Q&A:

*Iai am Titiraki ae ko kan tabekia nakon Emmanuera Newsletter ba tina kona ni ibubuki ni kaekai nakon ara beebe ae ena roko.*

**Titiraki (Q):** Aera Katoriko ae tataroa Nei Maria ao tiaki te Atua?

**Kaekakana (A):** E Kairua ae ngaira Katorika ti tataroa Nei Maria are tinan lesu ae ara Uea.

Ngaira Katorika ti bubutia Nei Maria ba ena karokoa ara bubuti iroun natina. Ai arora ngaira ae ti kakarineia tinara ao n ongo aia taeka nakoiria ao ai bon aron naba lesu, E ongotaeka ao e kakaraoa nanon tinana ngkai E bon rangin akoa tinana. Ti bon kakabaia ngaira Katorika ba a roroko ara tataro nakon lesu ae Atuan aonnaba rinanon tinana ae Nei Maria.



Karaoan ana kanimabui (50) n ririki te Charismatic n te aonnaba, iroun Tamara te Bobe Franciss i Roma, Itare 17-18 Beberuare 207

